

## Lustige Geschichte aus dem Jahr 1954

### Eis esse

Ich war ungefähr zeh un mein Bruder Walter vier, do bin ich uff die Idee kumme, mit ihm zusamme mit de Stroßebahn noch Derkem zu fahre. Stroßebahnfare war nämlich fer mein klenne Bruder ehns vun de schenschte Erlebnisse.

S war´en Sunndagmiddag. Vum Vadder hab ich mer Geld fer die Stroßebahn erbettelt. S´hott domols hie unn zurick 50 Penning gekoschd. Kinner unner sechs Johr waren frei.

De Vadder hot mer e Mark gewwe un hot g´saht: "Fer des iwrrische Geld dirfener eich e Eis kaafe." Des war viel. 50 Penning fer zwee Eis. Mer sinn uns arg reich vorkumme.

Dann simmer noch Derkem g´fahre unn zuerscht im Kurgaade schbaziere gange. Weil mich mei Großmutter ah immer dorthie g´fiehrt hot hab ich gemeht, dass des in Derkem halt dezu g´hert. Uff dem Weg sinn mer ach ans Kaffee Trauwerkur kumme.

In dem Moment iss mer des viele

Geld eigfalle, wu mer de Vadder mitgewwe hot. Ich hab donn a(n)g´fange zu iwerlegge. Bei uns im Dorf hot´s Bällche Eis 10 Penning gekoscht. Im Kaffee Traubekur isses mit Sicherheit e bissel deirer als im Dorfklädel. Ich hab hie un hergerechelt un gedenkt, des dut schon lange. Ich war jo noch nie imme Kaffee. Mer henn uns dann an en Disch g´setzt unn zwee Eis bestellt.

Zwee freundliche Dame henn sich noch zu uns g´setzt. Sie henn ach glei e intensives G´spräch mit meim klenne Bruder g´hat. Zum Beispiel hot ehr ihne erklärt, was e Plugskärchel iss, wie mer mit Karchschmeer umgeht un wie en Deddeder (Traktor) funktioniert. Schonungslos hot er ihne ach de Begriff Puhloch beigebracht. Die Dame henn jo vunn all dem kee Ahnung g´hat unn waren deshalb arg interessiert.

Bei mer sinn inzwischen Zweifel hochkumme, ob ich mich finanziell net doch e bissel iwvernumme hab. Tatsächlich hab ich beobacht, dass en junge Mann am Newedisch fer´s gleiche Eis wie unser´s 80 Penning bezahlt hott. Jetzt hab isch jo blos 50 Penning g´hat. Wann mer noch Gennem laafen un dodurch´s Geld fer die Schtroßebahn sparen, hätt des immer noch net ausgereicht. Die Lag war ziemlich aussichtslos. Ich hab mich zu meim klenne Bruder riwwergebeigt unn hab em unner Träne zug´flistert, dass´s Geld net langt. Prompt hot sich de Walter an die freundlich Dam newer sich gewandt un hot se net grad leise g´frot, so daß mer´s im ganze Kaffee g´hert hott: „Wäscht warum die Linde groint?“ „Nein, warum weint denn deine Schwester?“ hott die Dam mitfiehlend g´frot. Em Walter sei Antwort in voller Lautstärk war: „Dere ehr Geld langt net.“ Die freundliche Dame henn uns die ganz Zech bezahlt. Net emol mei iwrrisches Geld henn se genumme.

Mer war des nadierlich peinlich. Sie henn awwer g´saht, sie hätten so e schänie Unnerhaltung durch uns g´hatte. Des wär ihne die Sach schon wert.

Mer kann sich vorstelle, dass ich mich vun dere Zeit an vor´me Eisgenuß erscht nochem Preis erkündigt hab.

**Linde Blaul Gönheim**